

泉州府志卷之二

氣候

致治之道勤民為先勤民之事測候為急月令所紀
順時應物較然可稽然氣候布於天而實因乎地周
禮職方辨地之高下燥濕以播六穀之宜於是作訛
成易依其序而不紊封圻攸分氣亦隨之泉為南方
海國禾稻兩收霜雪罕覩大都寒少而燠多乃均茲
一郡而風雨之應咫尺難同田野閒每即其方隅以
自為占驗而應各不爽唯在為政者順五邑之氣而

泉州府志

卷之二

氣候

一

調四時之愆以上副

聖天子欽若敬授至意斯布澤施惠裕如矣作氣候志

唐歐陽詹二公亭記川逼滇渤山連蒼梧炎氣時迴濕雲

多來

韓偓登南臺詩四序有花長見雨一冬無雪卻聞雷

按臺在清

源山

宋郡志冬無冰雪或不御棉

圖經其地少寒故曰溫陵

遜齋閒覽泉州瀕海七八月多大風俗云癡風亦云颶風

其來風雨俱作飛瓦拔木甚者再宿廼止食頃有風自南來勢力尤甚名爲報風

陳宓惠民藥局記安溪氣候多燠春夏之交雨淖則河魚腹疾旱則瘴痞作焉又詩曰藍水秋來八九月芒花山瘴一時發

朱子安溪詩嵐陰常至午陽景猶氛翳

明隆慶府志氣候流行於天四時不忒然或因地勢高下而爲宜鬱故西北多寒東南多熱吾閩在東南隅氣候熱多於寒故有四時皆是夏一雨便成秋之說泉之氣

泉州府志

卷之二

氣候

二

候與興漳同晉江氣候與南安惠安同安溪地頗高其熱畧減大抵泉之氣候多由山嵐鬱蒸故春溫煩燠夏暑不清秋鮮涼風冬無冰雪土田恒煖而禾稻兩收桃李冬華而木葉鮮脫八九月閒民多患瘧緣此二

月山嵐尤盛故也

萬歷志同

惠安縣志山高氣聚蓄久鬱不散則成瘴毒甚暑月亦夜寒地氣使然也

按泉郡負海之國五屬之中晉惠同三邑最爲濱海欲知泉郡之氣候者又當以海爲言夫四時之中惟盛夏

及秋初始有南風其餘則皆東北風吹扇不停春冬二
候必天時極其和暖乃不鳴條否則自晝至夜怒號不
絕居人習以爲常亦無所厭蓋風者海氣之所鼓盪也
古云濱海多風是矣若夫三伏之時雖烈日炎蒸而流
金爍石恒在於交秋之後臘月之際雖嚴風栗烈而擁
爐御絮乃在於春雨之初晴明久而天氣自溫隆冬亦
爾雨澤綿而天氣乍冷炎夏猶然且土田煖故穀收再
熟之稻花木榮故樹多不彫之葉十月小春桃李舒萼
九夏驟雨溝澮皆盈或有時春初至而南風薰臘未盡

泉州府志

卷之二

氣候

三

而雌雷作此通郡氣候也而五縣之中亦畧有異者
晉江爲首邑都會之區連山亘其西北大海浸其東南
氣候最爲溫暖一冬不見冰雪有時畧隕微霜亦不殺
草四月以後梅雨鬱蒸輒礎皆濕春冬時作颶風風必
有雨但春則挾雨而兼風冬則先風而後雨亦有乾風
而竟不雨者瀕海鄉村煙嵐絕無而風貫四時無日休
息頃刻之間塵沙堆滿几上勢比郡城尤有倍焉田常
苦旱雨多尤澇故豐歉各居其半春種在穀雨前後而
小暑刈之秋種在交秋後而立冬刈之地煖故田事略

早耳

南安去郡城五里氣候與晉邑大畧相似風雨亦多不殊但去海稍遠風勢畧減近山多有煙嵐之氣夏月晝雖把扇入夜露涼暑氣頓息深村在岑阿之中頗覺寒冷有時嚴凍或凝薄冰見曦而融禾稻播種刈穫視晉邑遲一氣不憂旱亦不患澇大約豐多而歉少也

惠安亦西北連山而東南瀕海氣候溫暖與晉邑同春冬颶風其勢相等若夏秋閒陰雲湧起大帽山前後鬱結迴旋久而不散則必有暴風吹雨立至俄頃卽止不能遠及東北風亦三時長有通衢孔道時時飛沙揚塵南北行人艱於逆旅田多磽确仍復憂旱豐歉之年耕穫之候視晉邑亦無以異也

泉州府志

卷之二

氣候

四

安溪在泉郡之西重岡疊嶂離海已遠故風亦不及必颶風甚猛之時乃能害稼但亦十減其七氣候雖燠而迨夜則寒暑月晝雖苦熱夜半或蓋單被深山窮谷之中距郡有五六日至者冬月高峯或下霰雪氣又增寒煙嵐霾霧尤重秋月人多患瘧耕穫視晉邑遲一氣有餘平田一年再收山田止一熟而已水泉多而田足灌

漑故亦無甚旱乾之患也

同安係泉之南界與霞漳接壤地愈南則氣愈煖海多於山故東北風亦三時不絕颶風所發之勢不下於晉邑降及諸島如廈門金門之屬則冬月或連旬負暄宛如春氣春月或服單夾衣乘風納涼草木華實四時不改冰雪絕無而海霧時或昏霾耕獲視晉邑尤早陽和之氣轉盛故也

田家歲時占驗併風雨雜占

附

元日喜晴天陰東北風主大熟立春日同又俗自元日順

泉州府志

卷之二

氣候

五

數至八日止一雞二犬三猪四羊五牛六馬七人八穀若其日天色晴明則所屬之物蕃育否則災 立春後下霜不出三日便雨 天誕日有雨凡遇神誕之日多有雨 上元日朝占百果午占晚禾晚占早禾皆欲晴明諺云雨打元宵燈早禾一束稿 驚蟄前雷發聲主多雨諺云未驚蟄先發雷四十九日雲不開 三月三日聽鼃聲午前鳴高田熟午後鳴低田熟唐詩云田家無五行水旱聽鼃聲 春天氣候其變最易乍晴乍雨頃刻不同如晨起晴食頃卽雨晨起雨食頃卽晴往往

皆然 春天播種之時遇北風則禾爛根不生多黃萎
春月天氣陰寒主雨愈寒雨愈不住冬月天氣溫煖
主雨愈煖雨愈不休諺云春雨寒冬雨暖 春雨在颶
前冬雨在颶後 春天欲雨則西北山頭霧障冬天欲
雨則東南海口雲密諺云春看山頭冬看海口 立夏
及小滿日俱宜雨諺云立夏不下高田莫耙小滿不滿
芒種莫管 凡四月初一至初四日俱喜晴若雨則早
稻歉收初五有雨則主歲豐諺云七日雨果子荒言妨
果也八日雨破池塘言水漲也九日雨再起倉言多穀

泉州府志

卷之二

氣候

六

也 是月二十六日宜北風諺云南風吹過北有錢糶
無穀北風吹過南無錢也去擔 芒種前遇壬謂之入
梅此時氣候融液薰蒸甄地汗出几案潤生無日不雨
衣服食品之物最易陳腐至夏至後遇庚出梅方止
夏至在五月中則穀賤諺云夏至在月頭一弊一邊愁
夏至在月中愁殺糶穀翁是日又宜雨爲秋熟之兆
五月十三日關帝誕若雨名關刀水早稻多空粒不實
六月初三日有雨則多雨諺云六月初三雨七十二
雲頭 小暑大暑皆不宜雨諺云小暑雨餓死鼠大暑

雨餓死牛 六月十二日常北風農人最忌之是日無風則風不害稼極準 是月多暴風謂之風癡如得雷鳴則不患諺云一雷止三癡 夏閒久雨大水須轉西南風晴明若轉東南風晴明不出數日依舊大水 夏夜星密主熱夜晴而見閃電謂之熱閃在南主久晴在北主有雨諺云南閃千年北閃眼前 夏秋閒久雨若變東南風卽占大水蓋東南風則雨吹入諸縣深山中無處滲洩山水齊出溪流暴漲加以逆潮則水淹入郡城如遇潮退溪漲歸海卽不患 夏秋閒夜靜不風

泉州府志

卷之二

氣候

七

一天星斗閃爍搖動明日必風 立秋若在六月終則早禾反遲諺云六月立秋要到秋七月立秋不到秋七夕多有微雨俗謂之天孫淚 中秋月亮主冬稻豐收 中秋陰雲不見月次年元宵必雨諺云雲蔽中秋月雨打元宵燈 重陽日不宜雨諺云重陽無雨一冬晴 霜降日下雨冬稻白秕歉收晴明則結實有收 九月驟寒飛霜太早謂之青霜冬稻忌之 立冬日及十月朔日不雨主一冬和暖諺云十月初一晴柴炭土樣平以後又宜雨諺云十月雨連連高山也是田 是

月二十六日若晴則晴彌月風亦然 冬至雨除夕晴
冬至晴除夕雨諺云乾冬至濕年兜 冬至若在十一
月上旬歲暮寒在中旬冬及春皆和暖在下旬寒在春
後 冬至前米價高後必賤低則反貴諺云冬至前米
價長貧兒受長養冬至前米價落貧兒轉蕭索 大寒
小寒日雨雪損牛羊 臘月念四日多有風正月初四
日多有雨俗名送神風迎神雨 冬月三日風則三日
下霜又三日和暖歷驗皆然 凡氣候當寒之時或過
於溫暖南風薰蒸鬱而不達地下生濕人服單衣則天

泉州府志

卷之二

氣候

八

時必變立轉北風大雨滂沱頃刻化而爲寒暑月若炎
熱太甚氣帶津汗風寂不動午後西北方雲起雷雨交
作勢如傾盆若久不雨又無雷鳴氣帶乾燥風來如火
燒肌黃雲片片飛越則必有暴風害稼殺果拔木發屋
俗名風癡物極則變必然之理也 日暈主雨月暈主
風月暈看何方有缺則此方風來若圓而無缺亦主多
雨占書云月暈若無門半夜雨沈沈然惟秋冬月暈多
主風春夏月暈則主雨 日將入有赤霞薄繞之已而
散爲日腳者主風 雲細細滿天如魚鱗狀者亦主風

日入後起青白光數道東西亘天惟夏秋閒有之俗呼青白路主來日酷熱 日出早主雨晏主晴此言久雨之時正當天明雲忽一掃而捲卽日光出所以言早少刻必雨言晏者日出之後雲漸漸開也必晴皆驗無差 久雨未晴忽於當午見日少頃雲卽復布其雨更甚 凡久雨晚後雲開西邊返照爽朗則來日必晴 清晨下雨雨必不多黃昏下雨則雨連夜不停五更雷鳴亦主大雨 凡虹長半天一頭掛南入海主大水兩頭俱在東北掛山主食禾稼 中天有斷虹無首尾長

泉州府志

卷之二

氣候

九

一丈或數尺者主大風雨俗名破帆風 稻當開花時有虹見或午閒遇西北風夜閒閃電主穀不實又似雨非雨時下數點皆主虫 早稻將熟之時宜烈日不宜陰雨或每日有西北雨雨過日晒禾亦易熟冬稻將熟之時有雨則其穀愈實諺云春稻頭戴火穩稻水淋尾 凡果實之類與五穀相消長荔枝楊梅太多則是歲荒歉諺云山頂紅地下空 凡晴天之時日入後滿天紅霞如絲如縷不作大片者主明日陰雨若成片則晚霞主晴朝霞主雨 鳴鳩有還聲者謂之呼婦主晴無

還聲者謂之逐婦主雨 家雞宿遲主陰雨母雞負雛
謂之雞馱兒主雨 觀鵲巢以占一歲風之大小獺窟
以占水之高下 蝦蟇鳴主雨 天將雨則蟻出穴負
土成封 海嘯主風礎潤主雨

泉州府志卷之二終

泉州府志

卷之二

氣候

十